



UNIVERSITÄTS-  
BIBLIOTHEK  
PADERBORN

## **Arbor Vitæ Sive Vita Et Doctrina Christi**

Ex Quatuor Evangeliiis In Meditationes Quotidianas Velvti Totidem Ramos  
Distributa

**Illsung, Jakob**

**Dilingæ, 1693**

Meditatio CCXVII. De Nuptijs in Cana Galilææ.

---

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)





propinquis debitæ minùs studiosam, cujus intentione actus de se indifferens, elevatus fuit ad gradum Ordinatæ Charitatis, & Pietatis. Hinc discere discretam Charitatem, & actiones indifferentes intentionis puritate ac sublimitate ad gradum sublimium Virtutum evehere. Nec dubium est, quin de istis Nuptijs dici potuerit illud Tobiaë 9. v. 12. *Accesserunt ad convivium: sed & cum Timore Domini Nuptiarum convivium exercebant.* Sic, cum corporali refectio- ni amplius aliquid indulgendum est, cum Timore Domini, & ea Moderatione, ac Modestia interiori & exteriori id facito, sicut faceres, si Christum, ac B. Virginem præsentem cerneres; & sicut ipsos fecisse cognosces.

PUNCT. I. *Et deficiente Vino dicit Mater JESU ad eum: Vinum non habent. Et dicit ei JESVS: Quid mihi & tibi est Mulier? Nondum venit hora mea. Dicit Mater ejus ministris: Quodcunque dixerit vobis, facite.* Observa, quòd, ut ad finem hujus Miraculi v. 11. Evangelista dixit: *Hoc fecit initium Signorum JESVS in Cana Galilæa; & manifestavit Gloriam suam: ita etiam hoc fecerit initium Signorum MARIA, & manifestavit Gloriam suæ Potentiæ apud Filium, ac Misericordiæ erga Genus humanum.* Unde quasi pari passu ambulant Potentia Filij in operando ac benefaciendo, & Misericordia Matris in intercedendo; cum DEVS omnia velit nobis dare per MARIAM. Et quamvis Potentiæ Patrocinij videantur derogare illa verba Filij: *Quid mihi & tibi est Mulier? Nondum venit hora mea:* Si ea tamen rectè intelligantur, prout B. Virgo ea intellexit, quando isdem non tantum non absterrita, sed animata est, ut certa se exaudiendam, diceret ministris:



ministris: *Quodcunque dixerit vobis, facite*: patet, ijs potius declarari Potentiam Patrocini; quia ijs solummodo indicare voluit Christus, se quoad Miracula patranda non subesse Matris imperio, ut propterea præveniat horam; sed se respicere ultra naturalem affectum Filij erga Matrem, longè aliam sui erga illam Amoris causam, ob quam etiam paratus sit prævenire horam; eò quòd nempe respiceret maximam Sanctitatem Matris, diceretque: Non quia Mater es, sed quia Mater Sanctissima es, nolo negare, quod petis; & quidem quod cum tanta Fiducia, ac indifferentia petis. Hinc ergo summam erga B. Virginem concipias Confidentiam: nam quia etiam non rogata, visâ solâ indigentia vini, mox intercessit, manifestavit ingentem suam Misericordiam. Et quia statim impetravit Vini optimi abundantiam, quamvis nondum venisset hora patranda Miracula, manifestavit pariter efficacem Patrocini sui Potentiam.

PUNCT. III. *Dicit eis JESVS: Implete hydrias aqua. Et impleverunt eas usque ad summum. Et dicit eis JESVS: Haurite nunc, & ferte Architriclino. Et tulerunt. Ut autem gustavit Architriclinus aquam Vinum factam &c; vocat Sponsum Architriclinus, & dicit ei: Omnis homo primum bonum Vinum ponit; & cum inebriati fuerint, tunc id, quod deterius est: Tu autem servasti bonum Vinum usque adhuc.* Hinc discite 1. Patrocinium B. Virginis, & Beneficentiam Filij prodesse tunc, quando fecerimus, quæcunque dixerit nobis. 2. DEVM exigere nostram cooperationem; atque ejus mensuræ, vasisque capacitati commensurare suam liberalitatem. 3. Christum Ecclesiæ & Animæ nostræ Sponsum, prius apponere Vinum, quod videtur deterius, nempe compunctionis,



ac tribulationis &c. *Bonum autem Vinum* consolationis ac gaudij servare usque adhuc, nempe in Æternitatem, quod est perpetuum *adhuc*, nunquam desinens. Non ita facit Mundus; ubi Momentaneum est, quod delectat; Æternum, quod cruciat.

## MEDITATIO CCXVIII.

*Christus eiecit negotiatores è Templo.*

Joan. 2.

PUNCTUM I. Considera, Christi primas & ultimas curas fuisse, ut Domus DEI quàm Sanctissimè haberetur, & nihil in ea indecens contingeret: hinc initio Prædicationis suæ, ut refert Joan. c. 2. v. 14. & sub finem ejusdem, quatuor scilicet diebus ante suam Mortem, ut recenset Marcus c. 11. a. v. 11. Negotiatores, Divina planè Potestate, cui nemo audebat se opponere, è Templo eiecit, Vultu & Voce ad iram non puri hominis, sed plusquàm hominis, severè compositis. *Et cum fecisset quasi flagellum de funiculis, omnes eiecit de Templo, oves quoque, & boves, & numulariorum effudit as, & mensas subvertit. Et his, qui columbas vendebant, dixit: Auferte ista hinc, & nolite facere Domum Patris mei domum negotiationis.* Joan. 2. v. 15. & 16. Quibus postremis verbis Auctoritatem Filij DEI interposuit: cujus Auctoritatis ac Potestatis signum petentibus, dixit: *Solvite Templum hoc, & in tribus diebus excitabo illud.* v. 19. quasi diceret, cum solveritis Templum Corporis mei per Mortem, Egoque tertio die illud resuscitavero ad vitam; tunc videbitis, quam habeam potestatem ad exigendam Reverentiam